




Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com



TAPAK 7

India atema taruba küm 25 ji kanga tongtimbang asütsü: PM Modi



TAPAK 8

Küm 60 tsüngda tang mezüngbuba Lobsan-i White House semdang

VOL. XVIII NO. 44 (ADOK 44) DIMAPUR

AMUNGNÜ (SUNDAY) YIMPOKSÜI (NOVEMBER) 22, 2020

₹ 5.00

Karbi kaketshirtemi Nagaland mokdangba anenogo



Karbi Students Association (KSA)-i Nagaland anema rongsenkettsüng mokdangba mapang khu abenba truck garitem lenmang nung anendena aliba angur. (File noksa)

Diphu, November 21 (Agencies): Assam chief minister, Sarbananda Sonowal den senden ka amentsü nangzükba sülen Karbi Students Association (KSA)-i Nagaland anema rongsenkettsüng mokdangba anenogo.

Naga nungertemi Karbi Anglong district kübok Daldali Reserve Forest nung ali atsünga agiba anema parnok mokdang ayongzuka liasü. Ajsüaka, Hokolbarnü KSA-i iba sentong anena atasü lemet.

"Nagaland mesüra Karbi Anglong-i iba tesem nung teka meii atatsü ta onok dang superintendent of police-i nangzükogo" ta KSA tir, Simeon Rongphar-i ashi.

"District administration-isa onok dang border pillar asongtsü

CRPF Camp, Sechü-Zubza anasa lenmang shibangtsü

Dimapur, November 21 (TYO): Kohima aser Dimapur tsüngda Four-Lane maparen sadema inyaksü atema CRPF Camp, Sechü-Zubza kübok aliba lenmang shibangtsü, ta Additional Deputy Commissioner Kohima, Lithrongla Tongpi Rutsa-i metetdaksüogo.

November 22 anepdang 7:00 ako nungi November 23, 2020 anepdang 5:00 ako tashi iba lenmang nung gari

Manipur nung school 2 senpak 1 yong yokdok

Imphal, November 21 (Agencies): Manipur nung taoba Congress sorkari sorkar school ana senpak 1 yong yokdokba atema Federation of Haomee-i BJP sorkar tsüngdang ken o benokogo.

Manipur sorkari Tondonsana High School aser Bengali High School ana nija school kümdaktsütsü atema Rs 1 agi yokdok. Anungji BJP sorkari iba inyakyim bushisüngdangtsü atema luden ka tentetang, ta

aser Indian Reserve Battalion camp agientsü atema jembitsü ta onok dang nangzükogo" ta paisa ashi.

Assam Chief minister aser KSA tsüngda anogo pezü tashi nung senden ka amentsü akok.

"Onoki akhangba ama meinyakra, onoki maneni rongsenkettsüng mokdangtsü" ta KSA tir Rongphar-isa metetdaksüogo.

Külen, KSA aser Dimapur Naga Students Union tsüngda Khatkhati nung senden ka menogo aser iba mapang telok anaprongi arrtsü tebilemtsü den tanga onük aika benoka lemsatop.

Kaketshir teloktemi Karbi Anglong Autonomous Council aser Assam o Nagaland sorkartem dang iba tebilemtsü angatetteptsü atema ayongzükogo.

mesenzüdaktsütsü.

Iba mapang gari tilatemi Don Bosco School Sechu-Zubza approach road nungi Shalom Bible Seminary/ Assam Rifles Camp Zubza Road ajanga senzütsü akok..

Maneni, gari tulutem Tsiesema nungi 10 Mile Road ajanga Peducha bridge len senzütsü akok, ta ADC Kohima-isa metetdaksüogo.

Federation of Haomee-i shidi ka züluogo.

Mapang talangka iba school ana nungi kaketshir tajung aika adokogo. School ana senpak 1 yong nija school kümdaktsüba ajanga minister kari sen aika aazüker asütsü, ta parnokisa ashi.

Tesüiba sorkari class tagidak nung school ana ya shibangtsü aser sorkar school kaketshirtem kilometre 3 tashi pilar aliba school-i yok, ta Federation of Haomee-isa metetdaksü.

COVID-19 Nagaland: Nisung 66 dak putet; 2 asü

Kohima, November 21 (TYO): Honibarnü Nagaland nung nisung 66 dak COVID-19 putetogo aser parnok züngsema nisung ajak agi 10,674 kümogo, ta Health & Family Welfare Minister, S. Pangnyu Phom-i ashi.

"Tanü nisung 66 dak COVID-19 aliba putet. Parnokji Dimapur nung 51, Tuensang nung 14 aser Kohima nung 1 lir" ta Minister S Pangnyu-i ashi.

"Honibarnü COVID-19 puteta alir nisung 33 taneptsü nguogo. Parnokji Dimapur nungi 28 aser Peren nungi 5 lir" ta paisa ashi.

Nisung 10,674 nungi 9,137 taneptsü nguogo aser 1,370 anepaluba osang Health Department nung Director-i shiogo ta Minister Pangnyu-isa metetdaksü.

Nagaland nung taneptsü angubaji 85.6% lir aser nisung 105 tashi tanga state temi ogo.

"Honibarnü COVID-19 puteta alir ana asüba ajanga tasür ajak agi nisung 62 kümogo. Tanü Kohima aser Dimapur nung nisung kaka asü. Tasürtem rongnung parnok 51 coronavirus ajanga asü, 6 tanga timtem ajanga aser 4 asüba kuli bushitepdar" ta Director Dr Denis Hangsing-i ashi.

District balala nung COVID-19 putetba: Dimapur (5,970), Kohima (3,094), Mon (577), Peren (461), Tuensang (197), Zunheboto (139), Mokokchung (120), Phek (44), Wokha (29), Kiphire (25) aser Longleng (18).

Nisung 10,674 rongnung armed forces personnel 4,420, Traced Contacts 3,997, tanga state tem nungi arur 1,753 aser Frontline Workers 504 lir, ta Dr Hangsing-isa ashi.

District balala nung tang anepalurtem: Dimapur (803), Kohima (336), Peren (150),

Tuensang (41), Mon (28), Phek (7), Mokokchung (3), Kiphire (1) aser Zunheboto (1).

COVID-19 puteta alirtem rongnung nisung 37 dak shirangba yimya terara lir, 4 kanga shiranga oxygen agidar aser 6 ICU nung lir. Tanünga nisung 1,297 dakbo shirangba yimya kecha mali, ta Dr Hangsing-isa metetdaksü.

Taneptsü angurtem: Dimapur (5,064), Kohima (2,724), Mon (538), Peren (311), Tuensang (155), Zunheboto (135), Mokokchung (113), Phek (37), Wokha (28), Kiphire (23) aser Longleng (9).

"Nagaland nung COVID-19 alitsü akok ta temulung melemi bilemba sample 1,08,781 tendangogo. RT-PCR ajanga sample 66,369, TrueNat ajanga sample 35,501 aser Rapid Antigen Test ajanga sample 6,911 tendang," ta Dr Hangsing-isa ashi.

Centre-i COVID-19 sample timba tendangtsü ayongzük

New Delhi, November 21 (Agencies): Centre-i state aser Union territory tem dang Covid-19 azioktsü atema sample tendangba mapa tuluba inyaksü ayongzükogo.

"European aser American linüktem nung anogoshia nisung aika dak COVID-19 puteter. India-i iba tashidak azioktsü atema teinyaktsü ajak inyaker. North Indian state kar nung nisung aika dak Covid putetba nung ajemdaker Centre-i state aser UT tem dang

tendangba mapa tuluba inyaksü shiogo" ta tanü Union health ministry-i sangdong ka nung metetdaksü.

COVID-19 aika putetba state dangi Centre-i multidisciplinary teams yoktsü bilemer, ta Health Ministry-isa ashi.

Brihostibarnü Centre-i Haryana, Rajasthan, Gujarat aser Manipur kübok district balalai high-level teams yokogo.

COVID-19 aika putetba state dangi Centre-i multidisciplinary

teams yoktsü bilemer, ta Health Ministry-isa ashi.

Brihostibarnü Centre-i Haryana, Rajasthan, Gujarat aser Manipur kübok district balalai high-level teams yokogo.

Taküm January ita tom ka nungi India nung sample tendangba maparen tenzüker aser tang tashi nung million 130 shi tendangogo.

Hokolbar tashi India nung nisung 90,04,365 dak coronavirus aliba puteta liasü aser tasür ajak agi nisung 1,32,162 liasü.

Nagaland Civil Secretariat Complex-i shinga marudaktsütsü

Dimapur, November 21 (TYO): Tawa nisung aika dak COVID-19 aliba putetba ajanga Nagaland Civil Secretariat Complex-i nisung shinga marudaktsütsü ta Principal Secretary Home, R. Ramakrishnan IAS-i tanü metetdaksü.

Secretariat nung mapa inyaker ajaki ID Card abentsüla aser ibaji

Secretariat telungi aйдang checking staff dang sayutsüla, ta Ramakrishnan-isa ashi.

Secretariat nung inyakerteri tangar shinga anir marutsüla aser teti mask enoktsüla, teka metsüktsüla aser nisung o nisung tsüngda tepila ayutsüla, ta paisa nenshia metetdaksü.

Department dangi shiditem departmental email ids nung yoktsüla aser ibaji State Portal www.nagaland.gov.in nung angutsü. Aji ta mesüra, shiditemji gate nung aliba staff nem agütsüla aser Main Gate Reception nungi department Nodal Officer-i agütsü akok, ta Principal Secretary Home-isa ashi.

Arunachal nung NSCN(U) züngsem ka apu

Itanagar, November 21 (Agencies): Honibarnü Army aser Arunachal Pradesh Police-i Tirap district kübok Chattong yimtsüng nung NSCN(U) züngsem ka puogo.

NSCN(U) züngsemji Pongsa Wangpan ta jangjaogo aser pai tashiyim agi sen meshiba atema tai tonglokja apu.

NSCN(U)-i Deomali tesem nung shishilebartem, dokan kiburtem aser public lenirtem dang tashiyim agi sen meshiba ken o nung ajemdaker pa apu.

Deomali police-i Hokolbarnü

Indian Penal Code aser Unlawful Activities (Prevention) Act kübok ken o ka benoka liasü.

Onoki temulung melemi bilemba tesemtem mita ao aser bushisüngdang asüdang phone ajanga sen meshir indang bank account ka nung sen enokba bushitet, ta police ketdangser kati ashi.

Iba sülen Deomali SDPO Topha Wangsu aser Longding deputy SP (Headquarters) Banghang Tangjang nati anir telok kati Wangpan par kidang nungi apu.

Pa ket nungi Rs. 58,000 aser tashiyim agi sen meshia enokba bank account puogo.

Wangpan ya NSCN(U) züngsem ka lir aser pai Tirap district kübok Deomali sub-division nung pa tenu private Honkai Wangpan na den tashiyim agi sen meshiba maparen inyaker, ta police ketdangserisa ashi.

"Pa apuba ya NSCN(U) atema tetsükdaktsü tulu ka lir. Iba mapa ya DIG (TCL) lenisüba kübok Tirap SP-i ketdangserisa inyaker" ta ketdangserisa shisem.



CORONAVIRUS WARAS ENOK LONGJEMER AKOKTSÜ ASOSHI -

Quarantine nung amongertem ya shirangertem masü, parnok tesemba. Covid agi shirangertem tetsübu, Corona tashidak mesenang tsübuang.

- In collaboration with the Media Cell, RD department, Nagaland



Mkg nung Reorientation sentong agi



Dimapur, Yimpoksüi/ November 21 (TYO): Ayushman Bharat PradhanMantri Jan Arogya Yojana (PM-JAY) health scheme dak sendakba nung Reorientation senden ka November 20 nü Chief Medical Officer Conference Hall, Mokokchung nung agiogo. Chief Medical Officer Office sangdong ka ajanga ashiba agi, Dr.R. Chubala Aier-i sentong nung shilem agirtem pelashishia agizük aser Ayushman Bharat health care service nung maneni shilem tajung agitsü ajungshia liasü. District Coordinator Mr.Limatenzuk (AB-PMJAY)-i, Ayushman Bharat aser onük

tongtibangtem dak sendakba nung power point presentation ka agütsü. Pai, AB-PMJAY ya alima nung sorkari senotsü agütsüba insurance/assurance scheme tulutiba lir. Iba ya beneficiary tem atema sen mamshia health care services agiba sentong ka lir, ta ashi. Paisa, district sasep nung individual card kwi agütsür aser ECHP inakyim koma iba indang metetdaksü Iba sentong nung Mokokchung atema shimer aliba mozüki indang AB-PMJAY aser Ayushman Mitra Nodal Officer in charge dena liasü. Kasa mapang nung November 21 nü Chief Medical

Officer Conference Hall, Mokokchung nung training ka agiogo, kong SMOs, MOs aser ASHA coordinators tem nem NCD population based screening dak sendakba nung training agüja liasü. Iba sentong ya Deputy Chief Medical Officer, Dr. Kibangkumba lenisüba kübok agi. Pai Block level nung NCD screening indang tatsü agi rasaa ashi. Dr. Kilangwabang-isa, NCDs & Tuberculosis(TB) tashidak tamajungba maküm tsüingda jelia potettsü atema community based assessment checklist (CBAC) dak sendakba nung training agüja liasü.

H&FW-i tekümdangtsü metetdaksü

Kohima, Yimpoksüi/ November 21 (TYO): The Directorate of Health and Family Welfare, Government of Nagaland-i Brehostibarnü nisung dak disinfectants rakloksüba dak sendakba nung temetettsü kar metetdaksüogo. Principal Director of Health &Family Welfare, Dr. Vizolie Z. Suokhrrie-i November 19 nü ashiba agi, Supreme Court, Union Ministry of Science and Technology aser tanga ketdangsertem tetuyuba dak ajemdaker COVID-19 tashidak azüoktsü atema nisung dak disinfectant merakloksüla, kechiyong iba ya temang asoshi lendong lir. Ministry of Health and Family Welfare-isa, April 18, 2020 nü COVID-19 tashidak azüoktsü atema nisungtem dak disinfectant merekloksütsü atema tetuyuba ka agütsüogo. Tetuyuba nung, nisung ka mesera lokti dak disinfectants rakloksütsü khenyongi majungshir. Chemical disinfectants rakloksüba ya shi temang aser psychologically

lendong lir. Nisung ka dak COVID-19 mesen keta liaka tema nung disinfectants rakloksüba ajanga temang telungi iadoker aliba mesen metepseter. Ano süoshi aser tema disinfect asüba ajanga tashidak menatempa maouer ta scientific kuli kecha mali, ta shia lir. Nisung ka dak chlorine rakloksüba ajanga tenük aser teküp nung timtem adokdaksür aser iba den mangma mango aser saktünütsü atuba amala timtem adokdaksütsü ana nung lir. Sodium hypochlorite asuketba ajanga teni, terok, respiratory tract nung timtem agütsür aser iba ajanga tangula sadema mesashiteti kümdaksütsü akok. Maneni disinfection asüba ajanga kümzüka toktsütsü ta tia tebilemdangba adokdaksütsü aser iba ajanga teka metsüktsüba aser tetsüingta ita inyaksanshitsuiba amala inyakyimtem nung tetsükdaksü bener arutsütsü, ta Dept. Of Health & Family Welfare sangdong nung shia lir.

CHC Pughoboto nung Blood Analyzer ka amenok



Dimapur, Yimpoksüi/ November 21 (TYO): CHC Pughoboto nung Bio- Chemistry Blood Analyzer, November 20 nü Dr. K. Akaho Sema, CMO, Zunheboto-i bendanga agütsüogo. Iba machine ya Sumi Aphuyemi Hoho (SAH)-i achaayanga Pughoboto temeket nung alirtemi sarasadema rongsen tenla agüja aliba lir. Dr. K. Akaho Sema, CMO, Zunheboto, shiba Bio-Chemistry Blood Analyser machine bendanga agütsüba sentong nung alakteta jaoker liasü, pai Sumi Aphuyemi Hoho (SAH) nem department nem dang masü saka Sumi nunger ajaka atema tenüing tajung bener arutsüba atema tenüingsang agütsü. Paisa, wara pokteter aliba mapang lokti-i shilem tajung agiba atema tenüingsang agütsüba den rongsen intokba ajanga tarutsü nung süngjang tajung atangtsü, ta ashi. Machine amenokba sülen Pughoboto nung alirtemi

Kidney Function Test, Liver Function Test, Lipid profile, Serum Calcium, Serum Uric Acid amala service tem jenjang dalang agi agitettsü, ta pai ashi. Paisa, Zunheboto district aser Nagaland nung COVID-19 wara indang metetdaksü. Paisa, taruba ita asem ya COVID-19 tashidak azüoktsü atema kanga tongtibang asütsü anungji asenoki asen libaliro azüoktsüla, lokti senden takok tashi tajemba kümdaksütsüla aser mask asemba aser soap agi teka mapang shia metsüka aliba amala yimya benshitsü nüngdaker, ta ashi. Dr. Nukshisangla, DPO (RCH & UIP)-i, Aphuyemi lokti nem parnok mapa tajung asoshi tenüingsang agütsü. Laisa, sentong kechi südir süaka takok angutsü atema lokti-i shilem agitsüji kanga tongtibang lir, ta shia Blood Analyzer machine kanga junga anepalutsü ayongzük. Kasa mapang nung Ghuzhui

Shohe, Gen. Secy, Sumi Aphuyemi Hoho (SAH)-i, machine atema tenla agütsü tenzükba indang tatsü agi metetdaksü. Paisa, iba machine ya nüburtemi sarasadema rongsen tenla agütsüba aser Dr. Hokugha, SMO, Pughoboto CHC-i len kanga junga sayuba ajanga alitet, ta ashi. Machine bendanga agütsüba sentong ya Aphuyemi Sumi Küqhakulu, Kohima tir Ngukato. K. Tsuiyu lenisüba kübok agi aser SAH Secretary Vixepu Swu-i okila jembia liasü. Maneni Assisi, Pughoboto, ofm Cap, Parish Priest, St. Francis, Rev. Fr. Luke Nagahoto-i machine bendanga agüja sarasadema liasü. Sentong nungsa Dr. Hokugha, SMO, Pughoboto CHC-i, Pughoboto block kübok health units balala nem mozü lemja liasü, ta District Media Officer, CMO Office, Zunheboto Shekho Sophie-i sangdong ka ajanga metetdaksü.



Longmisa nunger Wb. Meyitoshi, 24 Angetyongpang ACCC tir asütsü shimba den repsema Congress party tanaben yanglushiba sentong ka November 21, 2020 nü agidang District Congress Committee, Mokokchung ketdangpurtem densema noksa nung angur. Mokokchung, November 21, 2020

Mokokchung nungyi pur aliba raksatsü

Dimapur, Yimpoksüi/ November 21 (TYO): November 20 nü Police Station-11 Mokokchung nung mapang balala nung pudener yua aliba yi case 81 raksaa intoktsüogo. Sepaitemi pur yua aliba yi

tem ya Temsuchuba SDO (C), Chuba SDPO, Purngangtet APP, Susang Ao P.I aser DPRO Mokokchung matsüingdang raksaa intoktsüogo, ta ketdangser sangdong ka ajanga metetdaksü.

GPRN-i asükhu lemsatep

Dimapur, Yimpoksüi/ November 21 (TYO): Konyak Region kübok Sheangha Chingnyu yimtsüing nungi Moba Brigade, Naga Army, (L) Brigadier Khatwang Tahkaishu, MSM (Naga Army No. AB-80614) November 20 nü asüba osang angazüka Government of the People's Republic of Nagalim (GPRN) mang ayimba sangdong ka ajanga lemsatepogo. Pa linük tenzüktsü atema 1981 küm August ita 8 nü züingksema liasü. Pai Naga lima bendanga agüja tenzükba atema Longvibu, Naga Army office ajanga pa nem November 20 nü Major General rank agütsüogo. Maneni Wung Tangkhul Region (WTR) kübok Zingsui yimtsüing nungi General Headquarters (GHq), Naga Army, (L) Sergeant Thangmeiso Kashak (Naga Army No. 42367/10) November 20 nü asüba osang angazüka GPRN mang ayimba

lemsatepogo. Adjutant General, Naga Army office ajanga pa nem November 20 nü Sergeant Major rank agütsüogo. Tenapronglai Naga lima masü tashi bendanga agüja tenzükogo aser tena melener angutsü tasak asütsü. Tenati pei taküm bendanga agüja Naga nunger tenzükba atema tena tenüing Naga nunger puti otsü nung teti atema mangaoka ayutsü aser teti menungraa bilemtettsü. NSCN/GPRN aser talisa Longvibu-i anir Naga Army-i, asür Maj. Gen. Khatwang Tahkaishu aser Sergeant Major Thangmeiso Kashak'er kinunger aser medemertem den asükhu lemsateper aser parnok nem mangyim jashi khuret koktettsü atema tashi agüjang ta sarasademtsür.Tsüingremi tena tanüla teti yimjung nung anisüingzükdakjang, ta sarasademtsür, ta MIP, NSCN/ GPRN sangdong ka ajanga metetdaksü.

TSR jawan temi Bru nunger anema noktaker ka khaset



Tripura kübok Kanchanpur sub-division nung Joint Movement Committee (JMC)-i lungkak aيتدang gari ka rongdoktsüba angur.

Agartala, November 21 (Agencies): Honibarnep Tripura State Rifles (TSR) sepaitemi Kanchanpur sub-division nung Bru-Reang refugee lidaktsütsüba anema lungkak aيتدertem dak injang khaloktsüdang nisung ka khaset aser pungu yirutsü.

Tasüsangji arishi küm 40 tain Srikanta Das ta jangjaogo.

Police-i self-defence nung injang akhatsüsa aküm, ta Additional Director General of Police Rajiv Singh-i ashi.

"Nisungtemi temelaba melii national highway noktang. Onoki parnok senshidaktsütsü merang aser lathi-charge asüba den injang tazüng khatok. Lungkak aيتدertemi ozüng alema inyak aser prangpong rakzüksü merang. Idangji police-i self-defence nung injang khaloktsü" ta paisa ashi.

"Iba mapang nisung ka khaset aser kar yiru. Külen Tripura Police aser Fire Service personnel 9 yiru. Parnok timba ka Panisagar aser Dharmanagar nung anepaludar aser ana Agartala nung aliba GBP Hospital-i anir ogo" ta ADGP Singh-isa metetdaksü.

Külen, Joint Movement Committee (JMC)-i ashiba agi, parnok timi dang lungkak aita lia police-i injang khaloktsü.

"Ozü nisungtemi timi dang lungkak ait. Police-i kecha meshii dang injang khaloktsü. Idangji nisung ka khaset aser aita yiru. Onoki ano osang

tejangja mangazük lir" ta JMC Convener Sushanta Baruah-i ashi.

Social Welfare Minister Santana Chakma aser local MLA Bhagaban Das nati lungkak aيتدertem den ajurutepegog aser yakta parnoki akhangba ama mapa inyaktsü ta tezüluba nung nangzükogog, ta Baruah-isa metetdaksü.

"Lisopur Tripura State Rifles (TSR) jawan kati lungkak aيتدertem dak injang khaloktsü aser lungkak aيتدertemi iba anema mapa inyakdang nisung aita yiru" ta Mizo Convention tanishir aser JMC lennir Dr Z Pachuau-i ashi.

Police-i injang khaloktsüba sülen lungkak aيتدertemi raradang TSR constable ka asü ta Pachuau-isa ashi.

Iba lendong atalokba sülen Tripura Police aser Tripura State Rifles (TSR) jawans aita mapa lezmüksüogog, ta sorkar ketdangser kati ashi.

Joint Movement Committee-i refugee temji khash mesüra sorkar ali, reserved forest areas mesüra forest cover-free lands nung lidaktsütsü aser sorkari parnok mesütsüla ta ashir aser ibaji opposition CPIM-ia pusema nungiter.

Ajisüaka, BJP-IPFT sorkari Bru nunger Tripura nung teti atema lidaktsütsü lemtetba pelashishia agizüker aser Mongulbar nungi Kanchanpur nung section 144 alema

inyakertem merenshitsü ta metetdaksüogog.

JMC ya local Bengali aser Mizo nungertemi tentetba lir aser parnoki Kanchanpur nung Bru nunger 30,000 lidaktsütsüba anema lungkak aiter.

Iba sub-division nung section 144 ozüng agüja lir saka tesüba anogo ishika nisung aita adenshir lungkak aiter.

Tanep lendong nung yirur nisung pezü tashi Dharmanagar indang district hospital nung anioka lir aser ka Assam kübok Silchar Medical College and Hospital-i anir ogo.

Taküm January ita New Delhi nung Union home minister Amit Shah lia Bru-Reang refugee tem Tripura nung lidaktsütsü atema telemetba agia liasü.

Iba mapa asoshi Centre-i Tripura state sorkar nem Rs 600 crores lezmüksü.

Tanü, Kanchanpur sub-division nung lungkak aيتدertemi tire rongga aser gari lenmang aita mokdang lungkak aiter. Parnokisa gari aita raksatsü aser kar nung mi senoktsü.

TSR sepaitemi Panisagar Holy Cross School anasa osang kecha magütsüi dang injang khaloktsü, ta JMC lennir Sushant Bikash Barua-i ashi.

Külen, police-i ashiba agi TSR jawans-i JMC züngsemtem nem national highway menokdangdaksütsü atema renema lir.

Taoba BPF lennir Daimary-i tanü BJP nung adentsü

Guwahati, November 21 (Agencies): Taoba Bodoland People's Front (BPF) lennir Biswajit Daimary-i Honibarnep Rajya Sabha MP menden nungi anenogog.

Deobarnü pai New Delhi nung Bharatiya Janata Party (BJP) nung adentsü.

Tawa tu Daimary-i party tanishir Hagrama Mohilary nem BPF working president nungi anenba shidi agüja liasü.

Daimary ya 2001-2006 tashi Assam legislative assembly nung MLA inyak aser iba sülen 2008-2014 aser 2014-2020 tashi Rajya Sabha MP inyak.

Bodoland Territorial Council (BTC) elections agitsü ita ka lia pai MP menden nungi anenogog.

December 7 aser 10 anogotem Bodo Territorial

Region nung election agitsü.

BJP national parliamentary board-i Hokolbarnü Rajya Sabha MP Biswajit Daimary BJP nung dendaktsütsü atema mulunga agizük.

Anogo ishika tejaklen, Assam kübok Tamulpur constituency nungi Emmanuel Musahary-ia BPF nungi anenogog.

BPF lennir anati iba party toktsüba ajanga BTC elections nung BJP tashi aittsü ta osang angazüker.

BTC election atema BJP-i parnok den yariteper BPF anema candidate aita toktepdaksür.

Daimary-i Assam health minister, Himanta Biswa Sharma den teti tongtepretepa aruba sülen menden nungi anenogog ta osang ajangasa ashi.



Guwahati nung Asom Chhatra Parishad (ACP) foundation day amongdang Agricultural Minister aser Assam Gana Parishad (AGP) tir Atul Bora den züngsemtemi bike rally ka agiba noksa nung angur. (Guwahati, November 21)

Jorhat nung ki aita rongdok

Jorhat, November 21 (Agencies): Assam kübok Jorhat jila nung tanep 6:00 ako meta kitsükkirong lendong tulu ka atalokogog.

Jorhat kübok Harijan Colony nung "Chhath Puja" amongdang iba lendong atalok aser ki 15 shi ka mitsü küma rongdok ta osang ajanga ashi.

Iba lendong atalokli mi ensepba garitem ao saka mi ulura asüba agi khen nung mi meremseptet.

Jorhat anasa aliba Teok nungi mi enseptem arua miji enseptet. Deputy Commissioner Roshni Korati-i anir ketdangsertem aita lendong atalokdaki ao.

"Mapang shitak nung

inyakba ajanga lendong tuluka nungi kümzükogog. Kibong 30 shi ka iba lendong nung takoksa ajuruogog aser onoki maneni bushitepdar" ta Deputy Commissioner Roshni Korati-i ashi.

"Nisungtem Chhath Puja amongi orr lia lendong atalokba ajanga nisung takümtem kümzükogog. Iba lendong ya charger light ka ajanga adokba liasü" ta Korati-isa ashi.

Lendong nung ki 10 shi rongdokogog aser cylinder 3-4 ka apok. Iba temeket nung alirtem Chhath Puja amongtsü atema orr aliba ajanga tia ka nisungtem lendong nungi kümzükogog" ta iba tesem nung alir kati ashi.

Assam bank nungi sen lakh 60 auya

Nalbari, November 21 (Agencies): Hokolbarnü Assam kübok Nalbari district nung nisung kari bank ka nungi sen lalh 60 auya.

Iba mapang auertemi injang khaloktsüdang Nayan Das ta ser nisung ka kanga mejungi yiru.

Nisung pezü motor-cycle nung arur Punjab National Bank indang Amayapur Jagyabhumi kongsang nungi senji auya. Parnok ya face masks aser

helmets enoker liasü aser bank staff dak pistol agi tui ter senji auya, ta ketdangsertemi ashi.

Iba tesem nung cartridge tazüng asem ngutetogog. Auertem aputsü atema bushitepdar, ta ta Superintendent of Police Amanjit Kaur-i-i ashi.

Das tetsüng nung injang agi akha aser pa Nalbari Civil Hospital-i anir aoba sülen Gauhati Medical College Hospital-i belenogog.



Honibarnep Assam nung journalist tongtipang Dharendra Nath Bezbaruah sor küm 87 ajungba anogomung mongogog. Bezbaruah ya Northeast nung English osangkaket- The Sentinel indang Founder Editor aser Northeast Writers ' Forum indang founder President liasü.



TIR YIMYIM YIMOBILEM (EDITORIAL)

DIMAPUR AMUNGNÜ, YIMPOKSÜI (NOVEMBER) 22, 2020

Temenen memenatsüsa ain adokba

Laishibai asenok dang kenyongi ain madoktsüla tabo mashir, saka ain adokaka temenenbo memenatsüla ta Efesa tapu 4:26 nung shia aliba angur. Asenoki iba Lai tekong nung shia aliba o ya jungjunga bilemdangra, ainbo adokyonga kecha mali saka temenen menatsüsa ain madoktsüla ta ashibaji temenen mapatem anemabo ain adoktsüla ta angatetsü junger. Atangji, nisung tajung aser taremsük süaka, taküm nung aiben ain adoktsüsa tensa tia ajurur. Iba jagi aiben tangartem den mepelatep adoker aser kar denbo takua chiteper. Ajisüaka, laishiba nung shia aliba amaji, taküm nung kodanga ain madoktsüla ta masü saka tamajungtem anemabo ain adoktsüla. Aji oda, kodang asenoki asen anema atalokba tamajungtem anema ain madoktir, ibajiang tai aser temenen menar asütsü. Ajisüra, tanübo asenok nisung shiai asenoka kodangsa ain adoker ta bilemdangtsü junger. Ashiko, asenok karbo asen taküm libaliro mejungi seplepa aoba ngua tangari metongshitsü nung, aji manganüi ki oset ajak raksaa ain adoka alitsüa akok. Mesüra aseni aginüba ka mangu aser matong nunga ain adoka alitsüa shibai metet. Ano, karbo tangar mapa nung takok anguba ngur mesüra kibong tajungba kuma aoba ngur tenük merem agi ain adok alitsüa akok. Aji oda, asenok ain adokbaji asen tai nembangtsü atema adokra mesüra asen dak tenük merem aser mekokachi shisatsü aliba agi tangar ajungba ngur mepelatep ain adokra, item ain adokba manung anü teludaktsü aser itemji asenok mulungjang nungi piladakjang ta kasa Laishibai ashir. Item ama ain adokba ajanga Tsüngrem anema temenen menaba ainapong tamajungtemji yutsür, tanü asen loktiliba nung tamajung kechisarina atalokba temenen mapatem anema Khristantemi ain madokra, asenokji temenen anema raratsü memulungba Khristan purtem asütsü. Efesa tapu 6 nungbo ashir, temenen anema takok ngua raratep asoshi Tsüngrem raraba sübotsü sübor asenoki alima nung tamajungtem anema raratsüla. Aji oda, tejen putu nunga kodang Israel nungertemi Tsüngrem jashitsüsa temenen mapatem inyak aser Egypt alar tia nungi parnok anitetba Yihova Tsüngrem yutsür süngyanglu külemtsü tenzük, Tsüngremi yokba ainkertem aikati ain adoka Israel nungertem arütsüba asenoki angur. Kasaji Yisu alima nung alidanga pai temenen tanülatem arütsü aser Yirusalem tenla kimabo pai shishilembartem meyong langpang dena mekupdokja inyakba asenoki tasen Laishiba nung angur. Iba ainji tanü asenok Khristantem dak alitsüla. Tanü asenoki ngua ozüng yanglurtemi ozüng raksar, ketdangsertemi ochishia ketdang mesütetter, nübortemi pei temeten sen yong aser mapa yong yoka achir. Akhi tejen putu nung Isaia ainker mapang nung ama, tanü asen putu nunga " Ochiobandang tesüleni meyipogo, teindang mapatem talangka nung oa lir, ochi yimdong nung laoa lir aser shitak inyaksü makoker, anungji ochii makoker aser shiba ochishia lidir pa dang akoksar," Isaia 59:14-15. Iba ama asen lima tia ya kodang asenoki ngudir, asenok mulung nung ain adoka mebilemiang malitsü. Item tamajung, ochi yimdong nung laodaktsüba temenentem anema asenoki ain adoka ayimtentsüla aser itemji ajungdoktsüla. Item jagibo nübortem rongnung meputep aser tsükchitep madokdaksür. Laishiba nung temenen memenai ain adoktsü ajungshibaji itemji asütsü. Atangji, tanü asen meketa tamajung agi sünga liaka, asenok mejashir, ain madoker saka pelapela dang lir. Aji oda, tamajung nung pelaba Khristantembo asenokang asütsüa akok. Asenoki tamajung aser temenen mapatem anema ain adoktsü melen temenen mapatem ajanga takok anguba asoshiang tenüngsang agütsüteper. Asenoki joko tamajung o tajung na aser teindang o meindang na tsüngda mebandangtetter. Ashiko, ibaji Efesa tapu 4:19 nung shia aliba ama, asenok tamang aser tangatetba nung 'pezüpezüa' akümba agi, temenen mapatem anema ola adoktsü tashi mali aküm asütsüa akok. Aji oda, tanü ama ochi yimdong nung laoa aliba mapang ya asenoki tamajung anema ain madokba yaang tai asütsüa akok. Iba tangatetba nung asenokbo tai menatsüsa masü saka tai anemabo ain adoktetsüsa asenoki Tsüngrem dak amangdi.

OLEMSABANG

NEBUKADNEZZAR ASER HON SÜNGYANGLU

~ Süpongnüngsang Longkümer, Darogapathar Dimapur

Asenok ajaki iba Lai shisadangti, saka tamasa amangbapur ajak dang khrista temeim salem sangoktsür. Daniel 3: 1-7 Nebukednezzar chubai Hon süngyanglu ka yanglu, aji talang nung süklep roker(60) aser Lenten nung süklep terok(6); pai aji Babilon province Dura Lenten nung meso. 2- Idangji Nebukadnezzar chubai mesoba süngyanglu meshitetdaki arutsü asoshi, Nebukadnezzar chubai tamarenürtem, Governortem, Tirtem, Obendangertem, terizüngertem, shisa agütsürtem, sen kiburtem, aser province yimsüsürtem külemi atenshitsu tajai yok. 3- Idangji tamarenertem, governortem, aser tiyirtem, obendangertem, terizüngertem, shisa agütsürtem, sen kiburtem, aser province madak yimsüsürtem ajak Nebukatnezzar chubai mesoba süngyanglu meshitetdak atenshi, aser süngyanglu madang parnok nokdak. 4- Idangji chubar osangpener kati tashe agi ayimten, "Oh nüpurtem aser kintem aser oshitem , nenok dang ya melar, 5- koba mapang nung jangzü ola, jemji, tzürang kongki aser kongki tapu meyina , aser ken tapu ajak angashitir, nenoki apudaktsü aser Nebukadnezzar chubai yangluba hon süngyanglu külemtsü . 6- Aser shibaisa mapudaklir aser mekülemlir idangyongji jangrua aliba mimong misem nung poktsütsü" 7- Anungji iba mapang nung nisung ajaki jangzü ola, jemji, tzürang kongki, aser kongki tapu meyina, aser ken tapu ajak angashidang apudak aser chubai mesoba hon süngyanglu külem. Iba süngyanglu külemtsü Daniel tembar asemi tashi manga. T-16 Shadrak, Meshak, Abednego chuba dang langzüa ashi onoki nü tang langzütsü tenüngdaksü maka 17- Ozü Tsüngrem onoki tenzüker, pai milak adoka aliba misem nungi onok kümzüksü koka lir.

Oh chuba pai nü ket nungi onok kümzüksü. Yamaji parnok mimong nung poktsüdang parnok poktsürtempo mi jagi rongset saka parnokpo sürara-a memerok (T: 21-23 nung angutsü). Lock down tenzükle kitsük kirong mapang kisen kecha magizüke rongdok saka Laishiba dak misem aser tarak kecha maket asenoki ngua aruogo. Laishiba koda kümzük pa dak shidak amangteterpo pai kümzüksü jilia sayuba liasü ta angateter. Ijip nungeri Isreal onsara mezüngmeshia merenshiba agi Tsüngremi Ijip lima nüpur wara agi merenshi Anitet tapu 7: 14- tapu 11: 1-10 tashi nung angur. JA 8: 3, 4 Temeshipur sarasatem meyoktepdaktsütsü pa nem liangmesen jendi agütsü. Nebukadnezzar chubar nüpuri hon süngyanglu külemtsü retreta tashi anga ama sarasatema ajaki asür SOP-a retreta agizüker, sarasatem-a yamaji , kima yimtong nungpo tetsüpu mali Mask aser sanitizer dak temulung kanga alemer, teni tepang nempang aser mozützüji kü kibuba ta tashir mali, tekülemtsü atema tenlaki melapokteter, sadi benjong ama nung melapok majung Tsüngrem mali ama mozützü agi shidoker teni tepang nembanger jokshia jokshia mendaktsür.

AsenTsüngrem koleni ao? Shadrak Meshak, Abednego nunger kümzüksüba ama asenokpo mekümsüktetsü asü?. Covid 19 ya alimai amongi aruogo Tsüngrem mapangtong asünungpo JA 9: 12 Mezüngpuba ayatai tejashitsü süiogo, iba sülen ayatai ana arudake 11: 14 Tanapuba ayatai süiogo, ajiang tasempuba ayatai arudake. Kinük pezü ayimpangjempa tashidak arugo, Tsüngsak, Yipru mopong, Menoknok, Tzümetsüng, Rara osang, Tsürapor aser chirnur asüdaki motettsü nokdangba temeim mekonga akümba tatempang mapa ama asenoki ajurua arudake. Tsüngrem dak tamang maka SOP dak tamang akaba, teni tepang tenempang, mozützü tamshi, tamang agi Tsüngrem külemi arung ta ashitsü tsüpuseter. Dimapur nung tangar kin karmo tekülem kodanga meshipang agiyonga arurtem lirgo tenla kidangi tekülemi arurpo wara agi tongdaktsütsü ta ashi asü? Hau aika asüba angashiogo saka par tamangjia koma liasü aseni ashitsü makok. Tamang akarpo Tsüngremi tang kümzüker Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

China nung Arogo ka mita ao; pastor den Arogo züngsem trok apu



Shanxi province, China nung aliba Early Rain Covenant Arogo nung Khristantem tekülem sentong nung adenba noksa nung angur.

November 21, 2020: China nung Taiyuan, Shanxi province nung aliba Early Rain Covenant Arogo ka ketdangsertemi mita aoba sülen pastor den Arogo züngsem trok apu.

International Christian Concern (ICC) osang ajanga ashiba agi, November 15, 2020 nü Public security bureau, ethnic & religious affairs bureau aser ministry of civil affairs nungi ketdangsertem den police-i Early Rain Covenant Arogoi tenzüksüba Xuncheng Arogopur temoatsü sentep sentong agia lia mita ao.

Public security commander-i tekülem sentong lenisang indang phone meshizük aser Zhang Chenghao parnok den anir ao.

Tekülem sentong tembangba sülen commander aser ethnic & religious affairs bureau nungi ketdangsertemi Pastor An Yankui dang asüngdangyaa liasü. Iba sülen parnok Tenla ki shibangtsü,

Laishiba aser osangtajung ken kaketter den Choir süoshi bener ao.

Police-i Khristantem dang asüngdangyaba sülen tanga facility kati anir orr jail uniform agidaktsü aser teka alener puoka ayu, ta ICC-i metetdaktsü.

Khristantemji ghonda aika pua ayuba sülen parnok süoshi tanaben melendaktsü aser aonung 9:30 ako meta nung ang chioka liasü.

China Aid-i ashiba agi, Xuncheng Arogo ya Chengdu nung Early Rain Covenant Arogoi tenzüksüba Arogo lir. Iba Arogo nung pastor rongnung ka, An Yankui ya Early Rain Covenant Arogoi tenzüksüba seminary ka nungi graduate süa liasü.

2018 kum ketdangsertemi ERRC anendaktsü aser Pastor Wang Yi apuba sülen kum 9 tepuokdak ayutsü obendang agüja liasü.

ICC regional manager for

Southeast Asia, Gina Goh-i, tang China nung Chinese Communist Party aser Tir Xi Jinping nati tamangba yimsütem nokdang aser Arogotemji linük indang tsükchirtem ama züngshir, ta metetdaktsü.

Tan ita (November) Pew Research Center report ajanga ashiba agi, China nung tamangba yimsütem anema inyakba agi temaba jenjang ka tongogo.

Research agirtemi ashiba agi, linük 198 nung sorkari tamangba yimsütem anema inyakba (Government Restrictions Index) mezüngbuba jenjang nung China linük lir.

US State Department-i China linük ya country of particular concern (CPC) nung züngokogo aser alima nung Khristantem reshikangshiba linük tamajungtiba 50 rongnung China jenjang 27buba nung lir (Open Door USA's World Watch List).

ANOGO ABEN TSÜNGREM DEN

Tatidang koker külen, taküm korang

"Shibai tatidang aremzüker pa temoatsüba; kechiyong pai tatidang koker külen, taküm korang, koba Kibuba dang meimertem nem agütsütsü pai nangzük, aji pai angutsü".

Yakob 1:12

Tatidang ya satan meyong lir. Asenok senti taküm ka ya raksatsütsü asoshi, pai asenok dangi tatidang yoker. Asen taküm koba Tsüngremi pa sentong nung yanglu, aser Pa sentsüwangshi asoshi asenok nem Pai sempet agütsü, itemji shitak nung mamshidaktsütsü asoshi satani asenok atidanger aser asenok meimchir aika temenen sentong nung apur aser temenen lar akümer. Asen mera aoba shiaji asen sülen temenen jagi asenok mera tajungji raksatsütsü asoshi anidaker aser asen sentong tajungtem temenen sang nung tsüker. Temenen ya asenok taküm, shisatsü, tangatetba, aser tanela tamang jenjang teraksatsür ka lir. Kodang asen taküm temenen nem kokdaktsüdir asenok dak kecha tajung malitsü, kechiaser aseni jembiba, inyakba, bilemba ajakji temenen tashi nem azüokdaktsüba mapatem dang asütsü.

Adangji, asenok temenen lar ka makümtsüla. Temenen tatidangtemji asen tamang jagi koktettsüla. Temenen tatidang akoktsübaji asenok Yisu tembar asütsüla. Tsüngrem temeim angatetba taküm ka asütsüla, Pa akümtsübutsüla, Pa ozüng nung jajaba taküm ka asütsüla, aser ajak dak alaka Pa Tsübutsüla.

SARASADEM

Taochi Tsüngrem! Anogoshia liyonga aodang, tamanger ka ama temenen tatidang nung onok talangdaktsü. Amen

Khristan lenirtemi Nigeria nung Khristantem atema sarasademtsü ayonger

JOS (Nigeria), November 21 (Agencies): Khristan lenirtemi sorkar ketdangsertem dang Khristantem kumzüksü atema aiben mepishia arur, ajisüaka sorkari mangashiba ama toktsüba sülen Khristan lenirtemi tan ita piyong Nigeria linük nung Khristantem atema sarasademjang ta ayongzükogo.

Islamic kiralongrar telok-Boko Haram aser Islamic State West Africa Province (ISWAP) nati Khristantem amaker aser Khristantem puer aoer.

Evangelical Church Winning All (ECWA)-i Nigeria nung par züngsem pezü puer aoba chiokang ta takhangba agütsüdar.

ECWA nung Tir, Rev. Stephen Baba Panya-i, "Islamic teloktemi Arogo züngsemtem apuba sülen parnok chioktsü atema Arogo lenirtemi Nigeria sorkar dang akhanger saka sorkari kecha meinyaker," ta metetdaktsü.

Rev. Stephen-isa high school kaketsir Leah Sharibu, aid workers ana aser University nung azünger

kaketshir, Lillian Gyang aser 2014 kum apuba sülen tang tashi mechioki aliba tetsür 112 atema sarasademjang, ta ayongzük.

2014 kum Borno State kübok Chibok nung aliba high school ka nung tetsür 276 puer ao saka tang tashi tetsür 112 bo mechiok.

Pastor, Rev. Stephen-i, "Kü den külemi sarasademang. Asenoki Mathi 18:18-19 nung Tsüngremi nangzükba nung ajemdaker sarasademdi, ibaji ajanga Boko Haram/ISWAP mesüra Islamic kiralongrar telok balalai Tsüngrem chirtem aser ECWA züngsemtem-Leah Sharibu, Alice Loksha Ngaddah, Grace Lucas, aser Lillian Gyang nunger tia melatetsü. Iba denji külemi Chibok nungi tetsürtem atema sarasademtsüdi," ta ayongzük.

2018 kum February 19 nü Boko Haram teloki Leah Sharibu apuba mapang nung la arrshi kum 15 liasü. Dapchi, Yobe state nung aliba Government Girls' Science & Technical College nungi tetsür 110 puer aoer rongnung la densema lir; tanünga tetsür 109 jibo Muslim tsürtem asüba

agi chiok aser Leah-i Khristan yimsü toktsütsü memelungba agi la mechiok.

Tanur ana tetsü aser UNICEF nung aid worker, Ngaddah ya 2018 kum March 1 nü ISWAP kiralongrartemi Internally Displaced Persons camp ka amakba mapang nung puer ao. La puer aoba osang angazükba sülen tetsübo taoksa agi süadok.

Taku ya Action Against Hunger nung Health worker ka lir aser la ISWAP kiralongrartemi yaküm July 18 nü puer ao.

Lillian Daniel Gyang ya Borno State nung aliba University of Maiduguri (UNIMAID) nungi kaketsir lir aser la ya Christmas aser New Year lar kidang amongba sülen tanaben University-i meyipa aoba mapang nung ISWAP kiralongrartemi taküm January 9 nü pua liasü.

ISWAP telok yagi 2016 kum Boko Haram telok nungi pila. Tan ita nunga Borno State nung parnok Khristantem anaben tashi maakogo.

Boko Haram telok yagi Nigeria linük tesem ajaklen Islamic ozüng benoktsü

meranger. November 8 nü Khristantem tekülem sentong tembangba sülen parnok Pulka aser Gwoza jila na nung Khristantem maaka liasü.

"Aonung 9:00 ako meta nungi 11:00 ako tashi parnok Pulka aser Gwoza jila na nung Khristantem amak. Boko Haram telok jilai aruba sülen nisungtem dak injang sashia khaloktsü," ta osang ka ajanga metetdaktsü.

Nigeria nung Brethren in Nigeria (EYN) Arogo lenirtemi southern Borno State nung Khristantem atema sarasademjang ta sangdonger aliba mapang ka nung Boko Haram aser ISWAP kiralongrartemi tesem aika maakogo.

Ano tanga osang ka nung, Family Research Council kübok International religious freedom nung züngsem, Lela Gilbert-i, Nigeria nung Arogo lenirtem aser meimchir rara anentsü atema mepishiaka tensa tamajungba akümer, ta metetdaktsü.

Gilbert-i, "Nisung aikati Nigeria nung yimten lenirtem tashi maitba dang masü saka

ochimashirtem lir ta ashir. (Linük nütsüng tesimal shi tembangba sülen parnok Khristan nütsüng süaka) Ketdangsertemji Muslim nunger timba lir. Linük Tir, Muhammadu Buhari-a Fulani tribe nungi lir aser mitkar den police ketdangsertem timbaka Muslim nunger lir. Ibaji ajanga linük nung temelenshi adoktsü atema tetsükdaktsü agütsür," ta metetdaktsü.

United Arab Emirates nungbo ketdangsertemi, Nigeria nung kiralongratsü atema Boko Haram telok senotsü agi yariba atema UAE nung alir Nigeria nunger trok pua aitsüogo.

Boko Haram telok yarir Surajo Abubakar Muhammad aser Saleh Yusuf Adamu na akümüli piyong tepuokdak ayutsü obendang agütsü aser Ibrahim Ali Alhassan, Abdurahman Ado Musa, Bashir Ali Yusuf aser Muhammad Ibrahim Isa nunger kum 10 tepuokdak ayutsü obendang agütsüogo.

Abu Dhabi nung aliba Federal Court kati Boko Haram telok yarir Nigeria nunger trokji aitsü aser US sen senchi 782,000 achi.

India atema taruba küm 25 ji kanga tongtibang asütsü: PM Modi



November 21, 2020 nü Ato kilonser, Narendra Modi-i New Delhi nungi video conferencing ajanga Gandhinagar nung Pandit Deendayal Petroleum University pur 8buba Convocation sentong nung jembiba noksa nung angur. Kasa noksa nung Reliance Industries Chairman aser Managing Director, Mukesh Ambani-a angur.

Gandhinagar (Gujarat), November 21 (Agencies): India nunger nüchiso anguba sülen küm 100 ajungtsü (ano küm 20 dak tema lir) nung rangloker Honibarnü Ato kilonser, Narendra Modi-i, India nung temelenshi atema tang tongtibang tensa ka nung lir aser taruba küm 25 ji linük atema kanga tongtibang asütsü, ta metetdaksü. Pandit Deendayal Petroleum University (PDPU) kaketshirtem convocation sentong nung jembidang Modi-i, "India nung temelenshi atema tanü tongtibang tensa ka nung lir. Tarutsü India

yangertsü atema nenok teinyaksü mapa lir. Second ka shisadangang, asenok senti mapang ka nung alir," ta metetdaksü. Video conferencing ajanga iba sentong nung jembidang Modi-i kaketshirtem dang, "2022 küm India nunger nüchiso ngur küm 75 ajungtsü aser linük nüchiso ngur 2047 küm nung küm 100 ajungtsü. Iba tetezü taruba küm 25 ji kanga tongtibang kümtem asütsü. India nunger atema tongtibang küm 25 ji nenok atema-a kanga tongtibang kümtem asütsü," ta metetdaksü.

"Pei teinyaksü shilem agizükba mapang nungjagi takok tenzüker, aser shirnoki ibaji khuret amai bilemdir parnoki tamakok angur," ta pai metetdaksü. Honibarnüsa Modi-i University nung 45 MW Production Plant, Monocrystalline Solar Photo Voltaic Panel aser Centre of Excellence on Water Technology maparen tenzüksü atema lung azüngtsü aser Innovation & Incubation Centre - Technology Business Incubation, Translational Research Centre & Sports Complex semzükja liasü.

Agra nung doctor ka lar kidang tsüngset

Agra, November 21 (Agencies): Hokolbar nikongdang Agra nung arrshi küm 38 tepo doctor ka lar kidang lia tepsetba sülen Honibarnü police-i sangdong ka ajanga, iba ken o bentetogo aser aibelensangji puogo, ta metetdaksü.



Dr Nisha Singhal (File photo)

Aibelensang jagi Dish TV indang set top box recharge sütsü arur, ta shia doctor lar kidang jagi ayaketa liasü, ta police-isa metetdaksü. Police-i ashiba agi, aibelener lanursangji doctor lar kibongi meteta aliba nisung ka liasü. Pai amakba mapang nung doctor lar tanur anata yirutsüogo. Agra kübok Kamla Nagar area nung iba tatalokba mapang nungji doctor laji lar chirnurtem den kidang liasü aser la kinüngbubo (doctor) hospital nung duty nung liasü. Aibelensang jagi auyatsü nükjidong nung kidangi atuba

sülen kotari agi Dr Nisha Singhal terok rangdangtsü aser tanur ana dak kotari jagi atsüing. Iba osang angashia la kinüngbu ilonga kidangi aruba sülen la hospital-i anir ao, saka mekümszükteti asü. Iba tatalokba sülen police team ka lar ki tonga arua bushisüngdang tenzüker aser aibelensang jagi oset aika auyar motorbike nung ajentsü merangdang police-i apu. Police-i aibelensangji injang agi yirutsüba sülen hospital-i anir oa liasü.

India-i EU aser US den FTA tezüngzüktep agitsü atema jembitsü

New Delhi, November 21 (Agencies): 2013 küm nungi tenzüka India-i European Union aser US na den shishilembaba tsütsü tezüngzüktep agitsü atema mejembir, ajisüaka EU aser US na den free trade agreement (FTA) agitsü atema kobi melii ken o jembii tenzüksü. Narendra Modi-i aniba sorkari Regional Comprehensive Economic Partnership (RCEP) nung maden saka Economic blocs balala den tezüngzüktep agitsü atema melunga lir, ta osang ka ajanga metetdaksü. Alima nung linük aikati China anema nokdakba mapang nung India-i shishilembaba tsütsü tajangzük kanga angutsüa akok, ta kasa osang ajanga metetdaksü. India nunger atema

shishilembaba partner tulutibaji EU lir (shilem 11.1) lir, aser ibaji US den kasa shi lir aser China den shilem 10.7 lir. BJP nung Economic Affairs National otongdar, Gopal Krishna Agarwal-i, "European Union aser US na den FTA tezüngzüktep agira India-i tajangzük angutsü imlar aser iba atemaji kobi melii jembitsü," ta metetdaksü. "Tanga linüktem den shishilembaba tsütsü tezüngzüktep agitsü atema India-i memelungi mali," ta paisa metetdaksü. India-i EU den FTA atema jembia aruogo saka onük balala nung telemtetba magiteti 2013 küm nungi iba atemaji mejembir. "Coronavirus wara agi timtem agütsüba sülen European

Union rongsenkettsüing tashi aitsü atema tang onoki maongka balala nüngdaker," ta European Commission Tir, Ursula von der Leyen-ia sangdong ka ajanga metetdaksüogo. Sentong ka nung jembidang Federation of Indian Export Organisations (FIEO) Tir, S.K. Saraf-i, "India-i joko mapang meindoktsüla. Tanga linüktemi tezüngzüktep magidangyongi India-i tekaraba nung inyaktüla," ta ashi. Saraf-isa, "Asenoki asentenshir FTA den külemi tanga shishilembaba tsütsü tezüngzüktep agitsü atema jembitsüla. Tang Europe nung China anema inyakba ajanga India-i tajangzük angutsü, aser asenoki iba maongkaji magii metoktsütsüla," ta ashi.



Hyderabad, November 21, 2020: Hyderabad nung aliba Gandhi Hospital nung inyakertem mapai aruba noksa nung angur. Coronavirus wara kanga prokba mapang nung iba hospital nung coronavirus tashidak agi shirangertem ang yaria liasü saka Honibar nungi tanga medical services ajak tenzüko.

India nung Covid case lakh 90.50 jungogo; samples Cr. 13 tendangogo

New Delhi, November 21 (Agencies): India linük nung coronavirus case lakh 90.50 jungogo aser iba nungjagi nisung lakh 84.78 dak tema anepogo; linük nung iba tashidak agi shiranger anepba shilem 93.67 jungogo, ta Honibarnü Union Health Ministry data ajanga metetdaksü. India nung coronavirus samples crore 13 tendangogo aser iba nungjagi tesüsuba crore kaji tesüiba anogo 10 tsüngda tendangba lir, ta Health Ministry-isa metetdaksü. Linük nung coronavirus case ajak agi 90,50,597 jungogo aser tesüiba ghonda 24 tsüngda nisung 46,232 dak iba tashidak puteta liasü; tesüiba ghonda 24 tsüngda ano nisung 564 coronavirus tashidak agi asü aser iba tashidak agi asür ajak agibo 1,32,726 jungogo. Tanü agi anogo 11buba linük nung coronavirus agi teshirangdakpur lakh 5 den tajemba lir. Tang linük nung coronavirus tashidak agi teshirangdakpur 4,39,747 lir, aser ibaji caseload nungi shilem 4.86 dang lir, ta Ministry data nung shia lir.

Linük nung iba tashidak agi shiranger ajak agi 84,78,124 anepogo aser iba tashidak agi shiranger anepba shilem 93.67 jungogo saka iba tashidak agi shiranger asüba shilembo 1.47 dang kümogo, ta parnokisa metetdaksü. August 7, 2020 nü India nung Covid case lakh 20 ajung, August 23 nü lakh 30 aser September 5 nü case lakh 40 junga liasü. ICMR-i ashiba agi, November 20, 2020 tashi nung samples ajak agi crore 13.06 tendangogo aser iba nungji Hokolbarnü samples 10,66,022 tendangba densema lir. Anü külen Honibarnü Union Health Minister, Harsh Vardhan-i, July ita tashi nung India-i coronavirus vaccine dose million 400-500 alizüktsü atema vaccine company balala den sorkari jembidar, ta metetdaksü. "Medical kulitem nung ajemdaker vaccine agütsütsü. Asen linük nung nütsüing crore 135 dak tema lir, anungji khenyongi ajak peritsüsa vaccine malizüktsütsü," ta pai metetdaksü.



Ahmedabad, November 21, 2020: Ahmedabad nung coronavirus kanga prokba agi ghonda 60 tashi curfew özüng liasü; Honibarnü curfew tembangba sülen nüburtem train station-i aotsü atema tarensena nokdaker bus-i atuba noksa nung angur.

Rocket agi Kabul amak; nisung 8 asü



Honibarnü rocket agi Kabul amakba tesem nung garitem poksar aliba noksa nung angur.

K a b u l , Y i m p o k s ü i / November 21 (Agencies): Honibarnü rocket agi Kabul amakba lendong nung nisung ti süogo, ta ktdangsertemi metetdaksü. Tawa Afghan yimtiba nung azütokshiba lendong aika ataloka arudar.

"Kiralongrartemi Kabul yimti nung rocket 23 khaloktsü. Osang ajanga ashiba agi nisung ti süogo aser nisung 31 yirur lir," ta interior ministry otongdar Tariq Arian-i ashi, shiba Taliban aija liasü. Police source ka ajangja asütem jangjatsüogo.

Rocket tem yagi embassies aser international company tem amenoka aliba Green Zone anasa tesemtem densema central aser north Kabul nung tesem aika anepdang 9:00 ako matong tsüngda poksatsü.

"Tanep kiralongrartemi Kabul yimti nung rocket 14 pokloksü," ta interior ministry otongdar Tariq Arian-i ashi.

Online nung prokshiba noksa aser video nung medical complex tulu ka densema ki aika jara aser kichiba raksatsür aliba nguogo.

Telok kati danga iba lendong bener arutsü menanzük aser

Taliba-ia iba tetalokba nung parnok densema mali, ta shiogo.

Tawa Kabul kübok educational institutions ana maka nisung 50 shi tepsetogo aser iba sülen taoba mapang ama sorkari Taliba dak tongloksü koba parnoki magiziük.

"Rocket agi Kabul yimti amakba ya Islamic Emirate indang mujahideen dak kecha sendaka mali," ta Taliban otongdar Zabihullah Mujahid-i ashi.

"Onoki nüburtem aliba tesem tenük amor mamaker," ta paisa ashi.

Taliban pur yimitem amaksü jenjang ka nung mali, kechiyong February ita tenanzüktepba yangluba nung parnoki yimitem mamaksü nangzükogo.

Iba amala inyakyim nung shilem agiba nangzükba ajanga US-i Afghanistan toktsür aotsü nangzükteper aliba atsülangdaksütsü.

Islamic State group-i educational centre ana amakba nangzükogo, saka Kabul-i ashiba agi, Taliban indang ultra-violent Haqqani network-i iba

lendong bener arutsü.

Taliban aser Afghan sorkara atema okatsürtem Doha nung September ita nungi yimjung asoshi sensaksemdar, saka terenlok kanga meyilongi aoer aser kasa mapang nung Afghanistan nungbo azütokshi tali kümogo.

K e t d a n g s e r t e m i Hokolbarnü ashiba agi, anogo shika tsüngda jenjang kabo agitsü imlar aser US State Department-i Hokolbarnü nükongtsütsü ashiba agi, Secretary of State Mike Pompeo-i Taliban aser Afghan sorkar tenung nung okatsürtem den Doha nung ajuruteptsü.

Taoba ita trok tsüngda Taliba-i suicide attacks 53 achaayanga inyakogo aser tesem balala 1,250 ben poksaja liasü. Iba lendong nung civilian 1,210 süogo aser 2,500 yiruogo, ta interior ministry otongdar Tariq Arian-i iba hopta ashi.

Interior ministry-isa, Honibar anepdang "sticky bomb" tila ana pokdaksüogo aser bomb ka police gari ka dak pokloksü. Iba lendong nung police ka asü aser asem yirua liasü.

Küm 60 tsüngda tang mezüngbuba Lobsan-i White House semdang



Lobsan Sanga (File photo)

Washington, Yimpoksüi/ November 21 (Agencies): Tibetan sorkar tekolakba, shiba linük nungi mintoker lir, pai küm 60 tsüngda tang mezüngbuba US White House semdangogo aser iba ajanga Beijing tali mepeladaksütsü akok, shirnoki United States-i iba tesem mesüngjemi kümdaksütsü meranger ta aija arudar,

Central Tibetan Administration (CTA) tir Lobsan

Sangay ya, Hokolbarnü US Special Coordinator for Tibetan Issues, Robert Destro den ajuruteptsü atema White House-i jaok, ta CTA-i sangdong ka ajanga metetdaksü.

"Iba senden ajanga US ktdangsertem den CTA külemi shilem agitsü atema jenjang ka yanglutsütsü aser taruba kümtem nung tali tebentetba akümstü imlar," ta CTA-i ashi. CTA ya India kübok Dharamshala nung

amenoker lir.

Tibet ya United States aser China na mangatetep adokba tesem ka kümogo aser alima nung rongsenketsüng tsütsü linük tulutiba ana tesendaktep tang tamajungba kümer aliba mapang ka lir.

Tibetan human rights sentoka toktsüba atema US Secretary of State Mike Pompeo-i July ita Beijing aitsüogo aser ashiba agi, iba tesem nüjiso asoshi Washington-i pusemer.

Iba sülen Beijing ktdangsertemi, China lemdangtsütsü merangtsü atema Tibet amshiba atema United States aitsü.

1950 nung China-i Tibet amokbang, koba taoba mapang feudalism benshia aliba intoktsü atema parnok nem teyari agütsütsü asoshi lir ta shia amokbang, ajisüaka tamangba yimsü lenir Dalai Lama-i anir iba ya sobaliba tepsettsü merangba maparen ka ta shi nisung aikati aitsüogo.

August ita China tir Xi Jinping-i, linük telongjem kümzüka ayutsü atema Tibet nung raksatsütsü makokba tejenokdak ka yanglutsü nüngdaker, ta ashi.

TEPELA TASOBA ANOGO

(22-11-2020)

Tsürabur Ojala **R. Achila Jamir** (Kangtsung) Tzudikong Town. Tsüngremi ojala arishi küm 83 tashi moatsü nung onok ajaki Tsüngrem tenung sanga ano la nem arishi talang moajang ta sarasadema amunger.

- Anükapang, Jala, Jabaso & Semchirtem.



Pakistan opposition-i district administration amokmeren



Peshawar, Yimpoksüi/ November 21 (Agencies):

Pakistan nung opposition party, Pakistan Democratic Movement (PDM)-i, Deobarnü Peshawar nung nüburtem adenshitsu asoshi tenokdangba agütsür aliba anema nokdaksü nangzükogo, aser longkak aiterem nokdangtsü asoshi tashiyim amshira iba ajanga lendong tulu adoktsü akok, ta shia district administration amokmerenogo

Peshawar Press Club nung osangbenertem den sensaksema mapang opposition party tem nungi lenirtemi, Imran Khan-i aniba Pakistan Tehreek-e-Insaf (PTI) sorkar matsüngtok tashi PDM-i sentong yanglur aliba ama linük kübok tesem balala nung rally tem ayongzüka agitsü, ta Dawn sangdong ka ajanga metetdaksü.

Peshawar deputy commissioner-i, November 22 nü Khyber Pakhtunkhwa nung rally ayongzüker aliba agitdaksütsü asoshi memulungba sülen opposition-i iba telemetba agia liasü.

"District Peshawar nung COVID-19 positivity rate shilem 13 ajangogo, koba taoktsüka kanga aika lir aser lokti tulu adenshia sentong agiba ajanga tashidak tali prokshia aotsü ta tsübua bilemer. Iba sentong agitsü asoshi temelaba meshiba ya magizüker ta sasaseta metetdaksür," ta Peshawar deputy commissioner-i ashiba Dawn sangdong ajangasa metetdaksü.

Tanga sentong ka nung Pakistan Peoples Party's (PPP) central information secretary Dr Nafeesa Shah-ia, sorkar dang nüburtem den masayatsü asoshi tekümdangtsü metetdaksüba den administration dang opposition party 11-i ayongba Peshawar rally ya yimjung nung agidakjang, ta ashi.

Mozü, chiyongtsü aser tanga

tenüngdakba osettem nung sen jenjang aika akümiba tebilemstü kaa Dr Shah-i, oset jenjang tali akümiba ya inyakyim meshidakba ajanga lir, ta ashi.

Laisa, wara pokteter aliba dak sorkar atsükoktsü meranger saka parnok tejenbolen mangutsü, ta ashi.

PPP lenir-isa, tawa Gilgit-Baltistan nung agiba election ajanga PTI ya election engineering ajanga tashi dangi aru ta jangja jangja sayuogo, ta ashi.

Kasa mpang nung opposition lenir aikati osangbenertem den sensaksema mapang Deobarnü rally agitsü atema temelaba magütsüba atema administration aitsüogo aser ashiba agi, sorkar anema nüburtemi nokdakba minprongtsü atema yimsüsürtemi tasa balala amshir, ta Dawn sangdong ajanga metetdaksü.

Maneni parnoki sorkar dang, PDM senden amentsü asoshi tetsükdaksü adokdaksütsü merangra iba ajanga nüburtemi yimti yimtung nung longkak ait tenzüktsü, ta tekümdangtsü metetdaksü.

"Onoki sorkar anema jenjang tamajungtiba dena agitsü renema lir," ta Jamiat Ulema-i-Islam-Fazl indang Khyber Pakhtunkhwa chapter chief Senator Maulana Atta-ur-Rehman-i ashi.

PDM-i taoba mapang Ato Kilonser Imran Khan mapa nungi anentsü khang Punjab, Sindh aser Balochistan nung rally ayongzüka agiogo.

Kasa mapang nung opposition candidate temi anir Gilgit Baltistan nunga longkak aitba sentong ayongzüka agiogo. Imran Khan-i aniba PTI sorkar pusemstü atema Deobarnü agiba indang election result menodaksüba aser meyipsatsüba atema PTI party-i local election commission aitsüogo.

ABAM 124 Buba küm tatem Mungdang agi



ABAM 124 buba küm tatem Mungdang Tir. Rev. Temsu Saser Tatongtir Dr. Lolen Imchen lenisuba kübok November 20, 2020 anogo kanga takok ngua agiogo. Tanü tensa tia-i memela nung akhidang nisung 1200 shi jaokba nungi taküm arogoshia nungi akhi ama mesui nisung ana aser asem dang jaoka agia liasü. Ajak agi Arogo 151 aser fellowship 3 nungi delegates 328 arua mungdang nung aten.

Rev. Dr. Mar Atsongchanger Executive Secretary ABAM ajanga osang agütsüba mapang Arogo nung tenzükertemi taküm tensa tia den peta media balala amshia Tsüngremer wadang inyakba asoshi pelaba shia ano maneni ya tetenzüker sur mapang ajak nung bendanga agüja tenzüksü ajungshi. Ano paisa ashi, asen ABAM otsü nung American missionarytem rongnung tatempang buba Rev. R. F. DeLano-i pai asen lima toktsüba mapang Feb. 7, 1955 nung, asen Aor dang joko onok arutsü lenmang jangjaa mangur onok küm 80 lia arudang Ao kin temoatsü tulu ngugo. Anungji nenok meketa aliba kintem sentoka tetoktsü ta ashiba mamai maneni osang tajung asoshi melaki inyaksü ajungshia liasü.

Mungdang mapang tongtipang telemtetba kar:

1. 2021 küm ABAM omen "Kulisuba" alitsü.
2. Tir Rev. Temsu S melen Tatong tir Dr. I. Lolen Imchen Mangmetong Tir shim aser Rev. Sentisashi Pastor KABA tatong tir shim.
3. Rev. Dr. Mar Atsongchanger Executive Secretary 2021 March nung term agi atonger asünung pa melena Rev. Dr. Mar Pongener, Principal CTC, Aolichen shim.

Kasa anogo nungsa ABAM SQC Memorial Building foundation long Rev. Dr. Mar Atsongchanger Executive Secretary, ABAM ajanga azünga liasü.

2021 küm maneni ABAM aser Lim arogotem külemi teka amteper Kibubar wadang inyakdang Kibubai moajangma ta ABAM sarasadem ayur.

Sd/-

Rev. Dr. Mar Atsongchanger
Executive Secretary, ABAM.

UGC-i Constitution Day amungtsü

Dimapur, Yimpoksüi/ November 21, 2020 (TYO): University Grants Commission (UGC), Ministry of Education, Government of India-i sangdong ka ajanga, aruya aliba Brehostibarnü (26.11.2020) Constitution Day (Samvidhan Divas) amungtsü, ta metetdaksü.

Iba anogomung indang tongtibang shilem kaji 'Preamble to the Constitution' azünga aser iba asalentong/tesayuba nung

anidaksü atema züngzüktepba ya lir. Taküm, Kevadia, Gujarat kübok 'All India Presiding Officers' indang Conference agiba mapang, November 26, 2020 anepdang 11:00 ako meta Ato Kilonseri anir Preamble ya azüngtsü.

Brehostibarnü (19.11.2020) UGC indang Secretary Prof. Rajnish Jain-i sangdong ka ajanga, iba anogo (26.11.2020) anepdang 11:00 ako meta, Ato Kilonseri

Preamble azünga mapang pa den külemi Rejutem indang ketdangser, staff aser kaketshir tem aser item reju den affiliated/ constituent College temi pei pei office/tesem nungi shilem agitsüla, ta tetuyuba agütsüogo.

Iba anogomung nung, COVID-19 temzüng nung anidaka, Rejutemi Indian constitution nung ajemdaker talk/ webinar tem ayongzüksü akok, ta kasa sangdong nung shia lir.

Kohima nung World Fisheries Day mungogo

Kohima, Yimpoksüi/ November 21, 2020 (TYO): Honibarnü (21.11.2020) Government Demonstration Fish Farm, Thizama Kohima nung World Fisheries Day mungogo. Iba sentong nung Advisor for Fisheries & Aquatic Resources, Evaluation, Economics & Statistics, L. Khumo Khamniungan tongti tesemdang ama aruagi dena liasü, ta sangdong ka ajanga metetdaksü.

Iba anogomung sentong ya Department of Fisheries & Aquatic Resources, Nagaland ajanga achaayanga agi, kong Commissioner & Secretary Fisheries & AR, Dinesh Kumar IAS menden liasü aser telok pela agizükba mapang pai World Fisheries Day amungba tetezü indang telok dang metetdaksü.

Advisor, L. Khumo-i, asenoki rongsenkettsüng tsütsü timtem balala ajuruba asadangshitsü atema iba anogomung ya amunger, ta ashi. "Aquatic eco system tem tajungtiba nung anepalutsü asoshi asenoki aginüba ama alima tesem ajunga nung Fishery tem tajungba melenshia achaayangtsü atema World Fisheries Day ya tongtibang lir," ta pai shisem.

Linük nung nüburtem nem chiyongtsü ka ama agütsüba dak alaka, India nung fishery ya

tongtibang secor ka lir, koba ajanga linük indang rongsenkettsüng ajungkettsü atema iba wadang yagi tongti shilem ka agir aser iba maparen ajanga GDP nung shilem 1.07 aser aluyimba den sendaktepa aliba wadang nung shilem 5.3 tashi nungitter, ta pai ashi.

Nagaland nunga ango metsürtem ajungkettsütsü nükjidong yur mapang shia teyari balala agütsüba atema Advisor-i department danga pelaba metetdaksüogo aser ango metsürtem maneni nungita yaritsü asoshi pai ajungshia liasü.

Additional Director of Fisheries & AR, Rongsennungba-i, alima nung India ya ango metsüba linük tulutiba lir aser iba sector ajanga global production den shilem 7.58% lemsateper, India indang Gross Value Added (GVA) nung shilem 1.24% aser agricultural GVA nung shilem 7.28% tashi nungitter, ta metetdaksü.

State kübok Fishery sector renlokdaksütsü atema Department-i project aser sentong balala achaayanger. State GDP timba tudaksütsü aser yimtsüng tem nung ango metsürtem ajangzükdaksütsü nükjidong yur department-i inyaker, ta pai ashi.

Additional Director-isa, Fishery maparen

renlokdaksütsü asoshi shilem tulu agiba atema department ketdangsertem, ango apurtem, ango metsürtem aser ango shishilembaba wadang nung inyaker ajak dang pelaba metetdaksü aser tarutsü nunga State rongsenkettsüng ajungkettsütsü asoshi maneni meranga inyakyonga aotsü asoshi parnok ayongzüik.

Iba sentong nung District Fishery Officer Wokha, C. Dory Yanthan aser Progressive Fish Farmers tenüng nungi ango metsür kati jembiogo. Sentong nung tongti tesemdangeri 'training manual aser leaflet' tem sayaa liasü aser Kohima District Fishery Officer, Dr. Vimezo Kire ajanga award/tenüngsang agütsü. Deputy Director, Neitho-o Kuotsu-i tepela anküp o jemi.

Maneni, iba sentong nung, Advisor for Fisheries & Aquatic Resources, Evaluation, Economics & Statistics, L. Khumo Khamniungan-i 'District Fishery Office, Kohima' lapoktsüogo. Iba sülen, Office lapokba nungtem nung common carp ngo metsüba yimyattem sayutsü asoshi sentong nung adenertem atema workshop cum training ka ayongzüik aser ango metsürtem den shisatokden sentong ka agia liasü, ta kasa sangdong ajanga metetdaksü.

Mulungnen O



MENDINARO LONGCHAR
10/09/1990 - 15/11/2020.

Temeimtila Jala Mendila,

"Oh! Mendi, Na Teyanglur Tsüngremeri kanga meimba jala. Na tubur tajung, sentsü tajung, aso-ajen tetemsü. Shisatsü tongmelang, teyarinü aser ochishir. Na iba akümlir lima nung tatsüka alidang, nü sempet ajonga agi, Arogo, lokti aser kija balala tajungtiba nung tenzükogoni. Tongdipangsa, kentenba sempet ajanga India aser bendanglen tesem balala nung nai jentipur mulung sünepdaksüogo. Manemi alidanga pei dang nungi tangar taoba ta bilema ne sempet tajung agi tenzükogoni. Ne tesadok jakla aser menürem jakten agi jentipur peladaksüogoni. Kidang aser loktisen balala nung, kotaklar ola ama ne kenten-menü agi nai onok lemladaksüogo. Tsürabur aser yimer-yimsanger nem ne kenten-menü sempet agi konang nungsang jenti bener arutsüogoni.

Na ali shi nung timtema shiranga alidang, ne shisa tajung ajanga asen kibong nung asentenshi tulu adokdaksüogo. Ne taküm tembanga arudang nai onok meimba agi ne tekangshi ajak miimbanga yur, menürema kotaklen rangloker ali nungi pilaba onoki kodanga mamatsü. Nai onok toktsür oaka ne mapa tajungtem alimai kodanga mamatsü aser itemji bilemtetdang onok pelateptsü. Onoki amanger, na tangbo, timtem tekangshi ajak kokteter kotak nung tenyarterm den pelatepa ken tendar. Kodang onoka Teyangluri jadir idangji asenok tanaben ajuruteptsü. Kanga menungraseta onok ne den pilar. Tesünep nung teti tatem makadak anisungzükanma "

Onoki kanga meima aliba jala Asür Mendinero Longchar (Chungtia) mapang tatsüka shiranga lir November 15th 2020 anepdang iba lima toktsür kodanga tatem maka anisungzükdaki ogo. La shirangba mapang nungi tasüba anogo tashi Arogotem, yimer yimsanger, tembar adianutem aser Doctor Nursestem kwinakati ozü asüku tulu nung sarasadem nüksü, shisatsü, rongsen aser nübu agi yariogo nenok ajak dang kangasa pelaba iba zülü ajanga lemsateper. Teyanglur Tsüngremeri nenok kija aser lokti ajak moajangma ta ozü sarasadem.

- *Teti meima aliba Tsüraburtem, Jabasotem aser Kinüngertem.*

"AO PIONEERS TAKÜM OTSÜ" - Tiala Imchen
KAKET ITEM TESEMTEM NUNG ANGÜTSÜ (Rs. 700)

Dimapur nung:

1. Christian Literature Centre (CLC).
2. Tangit Chowkidar, Duncan DABA Office (M- 9436267243).
3. Tir Yimyim Office, Super Market.
4. Duncan Tinali Junction nung dokan ka nung angutsü (M - 9774195073)

Kohima nung:

2. Wt. Tiarenla, PR Hill (near Civil Supply Office) (M - 9856330111).

OFFICE OF THE
KOHIMA CHUNGTIA SENSO TELONGJEM
Kohima - 797001 Nagaland

Kohima Chungtia Senso Telongjem nungi sorkar tenzüka wadang balala nung shirnokisa temaba jenjang nguteta konang nüngsang tulu bener arutsüogo nenok ajak nem KCST-i tenüngsang agütsür.

1. **Wt. Imtinenla** Joint Secretary, P&AR
2. **Wb. K.Senti Lkr**, Joint Director, Treasure & Accounts
3. **Wb. Imkongtoshi**, Joint Director, Soil and Water Conservation
4. **Wt. Süngjemkala**, Deputy Director, Employment Craftsman Skill Development Entrepreneurship
5. **Wb. Lanu Jamir**, Sub-Divisional Officer, PWD
6. **Wb. Aden Jamir**, Divisional Account Officer, Treasure & Accounts

Pei wadang maitsü-i takok ngua bener otettsü Tsüngremeri anema aliba ten areshi aser shisatsü moajangma.

Sd/-
(LANU JAMIR)
President, KCST

Sd/-
(I. MOA LONGCHAR)
General Secretary, KCST

Ligue 1: Monaco-i goal 3-2 agi PSG kokogo



Paris, Yimpoksüi/November 21, 2020: Louis II Stadium nung Paris-Saint Germain aser Monaco na tsungda Ligue 1 asayaba mapang, Monaco striker Kevin Volland-i (achilen) goal tanabuba idaktsüdang agiba noksa ka yangi angur. Iba asaya nung pai goal ana tashi idaktsüba ajanga Monaco-i PSG madak goak 3-2 agi takok angu.

Paris, Yimpoksüi/November 21, 2020 (Agencies): RB Leipzig den Champions League asaya ka nung tokteptsü aliba tejakdang Ligue 1 asayamung nung Monaco-i temaba team Paris St Germain madak goal 3-2 agi takok nguogo.

Iba asaya nung Kylian Mbappe-i PSG atema goal ana tashi idaktsü saka Monaco pur maoksa dang süngjema asaya. Asaya atemtsü minute trok lia Monaco-i penalty ka metsütsü maongka ngua Cesc Fabregas-i goal tasembuba idaktsü. Cesc-i goal meinoktsüdang, Monaco atema Kevin Volland-i minute 52', 65', buba nung goal ana tashi idaktsü.

Monaco-i asaya 11 nung shilem agir sülen, point 20 ngua par telok point 4 agi PSG tesülen lir. Mongolbarnü Group H telemsa nung PSG-i RB Leipzig den asayatsü.

Centre back asayasang Abdou Diallo, shibai Volland den asaya dak mapet yimya benshiba ajanga Monaco-i penalty ka angu aser pa

(Abdou) nem indang indanga red card agüja iba asaya nungi tukudakja liasü.

October 31, 2020 nü Nantes den asayaba mapang Mbappe tepi yiruba sülen nungi tang iba asaya nung PSG atema pai mezüng shilem agia liasü.

Iba asaya tenzüker, PSG-i Monaco team pur amokbanga asayatsü maongka ngua pai (Mbappe) minute 25buba nung mezüng goal idaktsü.

Telok ana tasayadak nung Youssouf Fofana-i Rafinha alandaktsüba sülen, minute 37buba nung Mbappe-i penalty tesem nungi goal tanabuba inoktsü. Minute ana sülen, Moise Kean-i goal tasembuba bendenloktsü, saka Video Assistant Referee (VAR) ajanga off side agütsüba ajanga iba goal magizük aser PSG pur goal 2-0 agi Monaco tejakdang ser mezüng half tembang.

Kasa mapang, mezüng half atemtsü minute ka anünga lia, Mbappe-i goal tasembuba idaktsü, saka referee Clement Turpin-i off side obendang

agütsüba sülen pai iba goal magitet.

Mezüng half temer sülen, Monaco-ia parnok asaya yimyatem melenshia liasü aser kanga dang kara minute 52buba nung Volland-i mezüng goal idaktsü. Iba sülen, Fabregas-i metsüba cross ball ka Volland-isa agizüka minute 66buba nung Monaco atema goal tanabuba idaktsü.

Goal ka idaktsütsü atema telok anga tokteptsü asayaba mapang, PSG-i aibelenba ajanga Monaco-i penalty ka metsütsü maongka ngua Spain team nungi midfielder Cesc Fabregas-i aibelen mesüi iba penalty idaktsü.

Aruya aliba Champions League nung Chelsea den asayatsü lia, Ligue 1 asaya tanga ka nung Girondins de Bordeaux-i Stade Rennais madak goal 1-0 agi takok nguogo.

Iba asaya mezüng half nung Bordeaux atema Hatem Ben Arfa ajanga minute 37buba nung goal ka idaktsüba sülen, tetoktepter telok kati dang goal talila meinoktsütet. Rennes, shirnoki Mongolbarnü Group E telemsa nung London Club - Chelsea akoktsü timla nung shilem agütsü renemdar, parnoki iba tamakok ajanga point 18 dang ngua iba league (Ligue 1) nung jenjang punbobubai luogo.

Mezüng half atongtsü minute 9 lia, Bordeaux-i iba goal mangudang Ben Arfa-i Rennes defender asem den meranga toktep aser Alfred Gomis kokteta ball bener lur pai iba goal idaktsü. Tang Bordeaux-i iba asaya akokba den point 15 tashi ngua, table nung par telok jenjang 11buba tongogo.

FIFA Awards sentong Dec. 17 nü agütsü

Zurich, Yimpoksüi/November 21, 2020 (Agencies): FIFA indang award sentong, koba küm shia agia arudar, taküm December 17, 2020 nü iba sentong ya virtual ajanga ayongtsü ternemba lir, ta FIFA sangdong ka ajanga metetdaksü.

COVID-19 wara tenokdangba ajanga France Football magazine-i parnok indang 'Ballon d'Or' tetokteptsü lemteba mapang ka nung football asayar takoktet tem bilemtetsü aser parnok nem akhüm agütsütsü atema, Hokolbarnü FIFA-i iba sentong ayongtsü sangdonga liasü.

Tesüiba ita ka tejakdang September, 2020 ita Milan nung FIFA Football Awards sentong agütsü renem, saka coronavirus wara junga süshia maoba aser tetsükdaktsü jenti ajuruba ajanga iba sentong mapang tatsüka atema thinenja ata.

Taoba küm (2019), Milan nung

iba Award sentong agiba mapang, record asütsüsa Lionel Messi-i FIFA men's best player award trokbuba aser Megan Rapinoe-ia la indang mezüng best women's player award agizükogo.

Iba Award sentong atema, aruya aliba Bodhbarnü (25.11.2020) nungi tenzüka national team captain aser coach tem den media aser fans temi vote agütsütsü aser iba maparen December 09, 2020 tashi alitsü, ta FIFA-i ashi.

Asayartem dak alaka, tebur aser tetsür indang soccer nung coach aser goalkeeper tajungtiba/ tajungtiba shima award agütsütsü aser 'best goal' atema Puskas Award agütsütsü renema lir.

FIFPRO global union ajanga achaayangba tebur aser tetsür indang team lineup atema asayartemi vote agütsütsü. Kasa mapang, FIFA-isa 'fair play' atema award aser 'special fan' sempet agütsütsü.

Luka Jovic dak Covid-19 putet



Luka Jovic (File photo)

Yimpoksüi/November 21, 2020 (Agencies): Real Madrid striker Luka Jovic dak coronavirus tashidak tejangja putetba ajanga, Honibarnü Spanish League - La Liga nung Villarreal den asayaba mapang Real Madrid nungi Luka densema tongtibang asayar anati iba asaya nung shilem magitet. Luka Jovic dak iba tashidak putetba osang ya Hokolbarnü Club-i sangdonga liasü.

Real nungi külem team pur Casemiro aser der Milito naprongla dak iba tashidak putetba sülen COVID-19 positive puteter rongnung Luka tasembuba alitsü.

Australian Open February mesüra March asayatsü

Sydney, Yimpoksüi/November 21, 2020 (Agencies): Australian Open, koba yimya agi küm tetenzüklen January nung asayadoker, Australia nung COVID-19 temzüng/inyakyim dak sendakba nung tebilemdangtsü balala aliba ajanga, taruba küm iba asayamung February mesüra March ita ayonga asayatsü ternemba lir, ta Honibarnü Herald Sun sangdong ka ajanga metetdaksü.

"Taruba küm tetenzüklen Aussie Open asayamung takok ngua asayatsü ni imlar," ta Victoria premier Daniel Andrews-i ashi.

"Tang tashi nungbo, iba asayamung atema tesem, anogo aser mapang telemsa renema

Tesüsa asayaba round nung Eden Hazard-a iba tashidak putetba ajanga masayatet aser Honibarnü Villarreal den asayatsü atema pa dang melaogo.

Item asayar dak alaka, Zinedine Zidane'er team nungi striker Karim Benzema, defender Sergio Ramos aser midfielder Federico Valverde shirnok taoba asaya nung yirua liasü, parnok shinga masayatet. Zidane-i ashiba agi, squad nung defender Raphael Varane aden yongjia, asayatsü asoshi ano pa temang agi memelar.

Benzema aser Jovic naprongla medeni, Honibarnü Madrid indang striker Mariano Daz asayaogo. Valencia nung 4-1 agi Real Madrid tamakok anguba mapang, Mariano-i mezüng shilem agia liasü.

Maneni, table nung Real Madrid point pezü agi Real Sociedad tesülen lir. Kasa mapang Villarreal-i jenjang tanabuba tongtetogo.

'Live Fast Motorsports' tasembuba NASCAR Team kümogo



Charlotte, Yimpoksüi/November 21, 2020 (Agencies): 2021 küm NASCAR nung team tasen ka densema, Cup Series nung 'ownership group' asem tashi akümtsü, kong Live Fast Motorsports team tasembuba ama NASCAR-i anioktsü. Iba team ya driver Matt Tifft aser B.J. McLeod meyong lir.

Taruba season nung McLeod-i 'No. 78 Ford' gari anitsü. Season ka nung Tifft-i Cup Series driver ka ama 2019 küm tesüsa shilem agiogo, kong Martinsville Speedway nung pa temang nung timtem ajurua liasü. Iba sülen nungi pai race asaya ka nung danga shilem agidanga mali.

Iba series nung arishi küm 24 tain Tifft ya team kibur (owner) rongnung tanobusang alitsü. Live Fast entry rongnung, Denny Hamlin aser Michael Jordan meyong '23XI Racing'

aser taoba mapang driver Justin Marks meyong Trackhouse Racing naprongla taruba season indang team tasen ama denogo.

Iba Cup Series nung driver ka ama, maparen ya ni atema kanga dang tulu lir, ta Tifft-i ashi.

Live Fast ya Mooresville nung amenoktsü aser Stewart-Haas Racing den longjemer inyakyim achaayangtsü. 2020 küm Go Fas Racing ajanga amshiba charter ka indang Archie St. Hilaire's ownership interest ya Tifft aser McLeod nati alizük.

Go Fas Racing group indang shilem - Joe Falk-i Live Fast den külemi inyaktsü. Go Fas Racing, kong Corey LaJoie atema No. 32 Ford shimtsüogo, iba schedule tatsüba kümtsür.

2014 nungi tenzüka 2019 küm tashi Cup, Xfinity aser Truck series ajunga nung Tifft-i 134ben tashi tejaklen ser shilem aru. Kasa mapang, McLeod-ia NASCAR indang National Series race asemprongla aser tesüsa tembang season - 16 Cup races nung shilem agiogo. Tifft arishi küm 12 alidang, Florida kübok driving school ka

McLeod-i Tifft mezüng ajurua liasü.

2019 küm Tifft kiyimba sentong nung McLeod ya 'groomsman' ka liasü aser tembar ana yagi team ownership nung longjemtsü asoshi jangradok.

McLeod-i ashiba agi, tetokteptsü asayamung ka atema asünung, taruba season nung 'No. 78' ya top 20 gari ka asütsü imlaa atar.

Küm 20 dak tema NASCAR nung tentet pungo agi asaya amokbanga arudar, kong owner tejen temi takok ngua shilem agidar aser team tasentemi kangarabo jangrabangra masayar. NASCAR kübok owner pungo rongnung arishi küm 83 tain Roger Penske, Joe Gibbs (79), Jack Roush (78), Richard Childress (75) aser Rick Hendrick (71) nung dena lir.

Onoki iba team nem takok ngudaktsütsü asoshi bendanga agüja inyaktsü. Taruba küm 20 nungi 25 tsungda tashi nung RCR, Hendrick aser Gibbs nung ama iba team nungtugu akümtsü kü mangdang lir, ta McLeod-i ashi.

BILEMDANGANG

"Bilemba kisung jagi masü, saka koktettsüsa mapa agi sayutsü nungdaker."